

左傳杜解集正

左傳杜解集正卷四

淮安山陽丁晏學

文元年二月癸亥日有食之 沈小宛曰元歷志姜岌云二月甲午朔無癸亥三月癸亥朔入食限大衍亦以爲然今歷推之是歲三月癸亥朔加時在晝去交分三十六日五千九百十七分入食限失閏也宋史歷志翰林天文鄭昭晏以爲其年三月癸巳朔去交分入食限

又傳於是閏三月非禮也 顧亭林曰古人以閏爲歲之餘凡置閏必在十二月之後故曰歸餘于終考經文之書閏月者皆在歲末文公六年閏月不告月猶朝于廟哀公五年閏月葬齊景公是也而左傳成公十七年襄公九年哀公十五

年皆有閏月亦竝在歲末是以經傳之文凡閏不言其月者言閏卽歲之終可知也今魯改歷法置閏在三月故爲非禮漢書律歷志曰魯歷不正以閏餘一之歲爲部首是也又按漢書高帝紀後九月師古曰秦之歷法應置閏者總致之於歲末此意當取左傳所謂歸餘于終耳何以明之據漢書表及史記漢未改秦歷之前屢書後九月是知歷法故然

又傳履端于始舉正于中歸餘于終 沈果堂曰周書周月篇云敬授人時巡狩祭享猶自夏焉夫閏以正時時以作事則此所謂時乃夏時也始中終卽每時而言履端于始謂測算斗建以紀啟閉在四孟月也淮南天文訓稱斗杓正月建寅月從左行十二辰以歷家實測追溯之周與漢固同建也

舉正于中謂歷象日景中星以紀分至在四仲月也按隋歷志堯時冬至日躔危唐歷志云躔虛宋天文志西周以前冬至日躔女元歷志謂堯時冬至日在女虛之交皆在正北之位冬至在正北則夏至在正南春秋分在正東正西可知故指其所在之位而稱爲正也杜解舉中氣以正月則以正爲月以中爲氣文義不可通矣歸餘于終謂積氣朔餘日以置閏在四季月也周禮太史職閏月詔王居門終月疏云明堂路寢及宗廟皆有五室十二堂四門十二月聽朔於十二堂閏月各於時之門是周本於四季月置閏也經傳所書閏月皆不得其月惟昭二十年閏八月於夏時適爲閏六月此偶合耳

又傳晉侯朝王于温 惠半農曰温實京師故王會諸侯於此諸侯朝王亦於此杜預謂晉侯自嫌强大不敢朝周其說尤悖不可以不辨

又傳卑讓德之基也 趙子常曰孔氏曰何休膏肓以爲三年之喪使卿出聘於義左氏爲短鄭康成箴云周禮諸侯邦交歲相問殷相聘世相朝左氏合古禮何以難之劉氏曰左氏見當時諸侯廢喪而聘故推以爲禮杜氏見左氏有得禮之言遂推以當喪而吉皆反經越禮不可以教後世今案結外援衛社稷春秋亂世之事也傳惟見此年夏葬僖公冬公孫敖如齊宣十年夏葬齊惠公冬齊侯使國佐來聘遂推以爲例其言凡君皆指當時之事爾非謂周制則然以周禮邦

交合左氏乃康成之失謂傳例爲周公之法自左氏之謬耳  
古者吉凶不相干故三年之喪不祭而何相聘問之有

二年經秦師敗績 沈小宛曰杜預云孟明名氏不見非命  
卿也按上傳云復使爲政則孟明實正卿矣不書其名者秦  
僻在西戎初交中國春秋之記由略而詳故孟明晦於前西  
乞著於後不緣貴賤也若謂非天子之命卿則屈完宜申詎  
是天子所命若謂備卿禮乃成爲卿秦之卿禮不備自非浮  
屠氏通宿命者無由知之

又傳書曰及晉處父盟 沈小宛曰傳有明文杜預之言喟  
嘲無倫胡安國曰去處父之族非特爲魯諱實責晉也

又傳書士穀堪其事也 沈小宛曰杜預謂士穀非卿以士

穀能堪卿事故書按莊二十六年士蔿爲大司空杜云卿官此言司空猶宋之大司馬大司寇亦單稱司馬司寇魯孟孫爲司空于當時皆爲卿官非一矣晉之法用三軍帥皆以次而升六年夷之蒐將使士穀將中軍使士穀尙不爲卿何能越次爲中軍帥傳言堪其事者發士穀見於經之故亦對上文處父盟言其事與處父異也杜橫加肥說誣傳

又傳廢六關 惠定字曰家語云置六關王肅曰六關關名魯本無此關文仲置之以稅行者故云不仁棟案廢與置古字通公羊傳曰去其有聲者廢其無聲者鄭志答張逸曰廢置也何休曰廢置也置者不去也齊人語以廢爲置猶以亂爲治徂爲存故爲今曩爲鼻苦爲快臭爲香藏爲去郭璞所謂詁訓義有反覆

旁通美惡不嫌同名也杜氏云去六關所以禁絕末遊而廢之周禮建國有門關關安可廢況後傳塞關陽關皆有明文豈旋廢之而旋復之歟杜氏此說昧於義矣小爾雅亦以廢爲置杜集解頗用孔鮒之說獨不及此何也

又傳襄仲如齊納幣禮也 顧亭林曰卽以僖公之薨爲十一月亦甫及大祥耳未畢二十五月之數何得云諒闇已終解謬 按此傳通言娶夫人之禮則可若在文公喪制未終而使卿納幣違禮拂經甚矣 沈小宛曰檀弓疏引鄭箴膏肓僖公母成風主婚得權時之禮愚按傳祇言納幣禮耳不及文公之事傳主爲經發凡文公之得失人自知之故不置可否劉敞橫譏左氏以喪娶爲禮卻是冒昧杜預謂諒闇旣



終又大謬也顧炎武曰卽以僖公之薨爲十一月亦甫及大祥未畢二十五月之數何得云諒闇已終

三年經秦人伐晉 沈小宛曰此惡秦也杜預言晉以微者告則此魯史又據晉告書之而不取于秦耶前後牴牾其辭如鬼

四年傳同盟滅 沈小宛曰續志汝南安陽縣有江亭故國羸姓方輿紀要江城在汝寧府真陽縣東南江國也按此則江與秦是同姓故秦伯矜之過數同盟猶言宗盟也杜解非也

六年經季孫行父如陳杜解行父季孫友子 馮氏名號歸一圖云行父季友之孫陳曙峰譜云按仲叔兩家皆再傳稱

公孫三傳始稱姓若行父爲季友子不當卽稱季孫也杜注似誤國語韋昭注季文子季友之孫齊仲無佚之子韋注必有據今从之 洪北江曰世本公子友生齊仲齊仲生無逸無逸生行父按穀梁疏引世本又云季友生仲無佚無佚生行父范寧注行父季友生生卽孫也與杜注同今本杜注作季孫友子大誤

又經季孫行父如晉 惠半農曰傳稱季文子之將聘于晉也使求遭喪之禮以行杜預謂聞晉襄有疾臆說也聘禮遭喪豈獨主國之喪哉其禮有五一主國君之喪二主國夫人世子之喪三聘君之喪四私喪謂使者父母之喪五賓介之喪其禮皆詳於聘禮故曰豫備不虞古之善教也人君出疆

必以禘從人君出聘亦豫備遭喪之禮古皆有之後世以爲  
驟凶事而去之則周禮不行於春秋久矣行父亦以爲其禮  
久不行故又曰過求何害豈逆料晉襄之死而先爲之備乎  
且聘使不弔喪主人長衣練冠受聘不受弔先爲之備又焉  
用之後之學者詳焉

又經閏月不告月猶朝于廟杜注文公闕不告朔怠慢政事  
雖朝于廟則如勿朝故曰猶猶者可止之辭 汪氏克寬曰  
春秋書猶朝于廟卽聖人愛禮存羊之意謂朔雖不告而朝  
廟不廢則告朔之禮猶有存者公穀皆曰猶者可以已也杜  
氏亦云可止之辭大失春秋之意

又傳易中軍陽子成季之屬也 洪北江曰按處父蓋嘗爲

趙衰屬大夫說苑師曠對晉平公曰陽處父欲臣文公因咎犯三年不達因趙衰三日而達是處父由趙衰方得進用杜注作趙盾蓋傳寫之誤成季趙衰諡成八年傳韓厥言于晉侯曰成季之勳宣孟之忠而無後爲善者其懼矣杜注卽云趙衰故知此注傳寫失也

又傳士會注隨季也 惠定宇曰世本曰范氏晉大夫隰叔之子士蔿之後蔿生成伯鞅鞅生武子會會生文叔變變生直叔句句生獻子鞅鞅生吉射棟案范氏本陶唐氏之後襄二十四年傳范宣子曰昔句之祖在夏爲御龍氏注云謂劉累也又云在周爲唐杜氏汲郡古文曰成王八年王師滅唐遷其民于杜杜伯之子隰叔違難奔於晉生子輿卽士蔿也

士為生士穀士缺缺生會食邑於范是為范武子故宣子曰

晉主夏盟為范氏焦弱侯曰士穀士會士皆當作土傳謫耳

讀為杜土姓杜伯之後土即古杜字棟案古土字皆作土見

敦敦史記曰有邦有士今呂刑作土周頌曰保有厥士義作土

呂覽任地曰后稷曰子能吾士靖而咄浴士乎高誘曰土當

作土周牧敦亦以士為土焦氏以為傳謫非也土本古杜字

鄭康成周禮注校人云世本曰相土作桑馬竹書亦荀卿子

曰杜作桑馬楊倞案世本相土作桑馬今左傳亦作毛傳自

土沮漆齊詩作自杜又云徹彼桑土韓詩作桑杜毛詩左氏

傳皆出孔壁中故多古文范氏在夏為劉氏周以前為唐氏

昭元年傳云唐人是因以服事夏商是也周以後為杜氏春

秋時爲范氏是會之帑留秦者又爲劉氏自虞以來世次秩然故宣子以爲死而不朽焦氏讀士爲土訓爲杜其言亦卓余故存而論之

七年傳樂豫爲司馬杜解戴公元孫 正義曰世本戴公生樂甫術術生碩甫澤澤生季甫甫生子僕伊與樂豫是也又文十八年傳使樂呂爲司寇杜解戴公之曾孫正義曰世本戴公生樂甫術術生碩甫澤澤生夷甫須須生大司寇今云曾孫誤也據世本樂呂乃戴公元孫杜好爲臆說不依世本非也又傳敗秦師于令狐至于刳首 顧亭林曰水經注引闕駘曰令狐卽猗氏刳首在西三十里後漢衛敬侯碑陰文城惟解梁地卽刳首山對靈足谷當猗口刳字作郟玉篇郟口孤

切秦地在河南當是河東之誤

八年傳致公壻池之封自申至于虎牢之境 顧亭林曰傳氏曰自申至於虎牢皆鄭地也不得致之於衛竊以上文言匡戚歸衛田也此言自申至虎牢歸鄭田也故杜於上年解云爲晉歸衛田張本而此則專言歸衛此杜氏之闕漏耳按自申至於虎牢鄭地晉取之以封公壻池今乃歸之傳文不言鄭言申虎牢則鄭可知矣 洪北江曰服虔以爲致之于鄭本按杜注旣言申鄭地則服說云致之于鄭方得事實寧有以鄭地轉致于衛者乎劉炫以服說規杜得之

九年經葬襄王 沈小宛曰杜預云卿共葬事禮也王制疏鄭駁異義曰天子于諸侯無服諸侯爲天子斬衰三年尊卑

有差按魯夫人成風薨王使榮叔歸含且贈召伯來會葬傳曰禮也襄王崩叔孫得臣如周葬襄王天子于魯既含且贈又會葬爲得禮則是魯於天子一大夫會尙不得禮可知又左傳鄭游吉云靈王之喪我先君簡公在楚我先大夫印段實往敝邑之少卿也王吏不討恤所無也豈非左氏諸侯奔天子喪及會葬之明文說左氏者云諸侯不得奔其所守奔喪自違其傳欽韓按隱二年傳天子七月而葬同軌畢至是諸侯會葬傳有明文此年傳但言莊叔如周葬襄王不舉例者正以五年有榮叔之含贈召伯之會葬信使交錯其待諸侯之禮隆且渥如是經書此遙遙相對其失禮無疑矣且以天子之喪而卿士出求金求者固非而藩衛之義惟知有伯



主不知有天子不愈顯侯國之怠慢乎以求金之來而如京師共葬雖道得臣亦非本意傳意微而顯而俗儒不之察創爲謬說

十年傳麋子 惠定宇曰麋亦作麇注不釋其地所在案盛宏之荊州楚之舊左氏傳云楚潘崇伐麇至于錫穴穎容釋例云麇在當陽

十一年傳獲僑如之弟焚如齊襄公之二年 洪北江曰按史記魯世家引此傳文作齊惠公之二年又齊世家惠公二年長狄來王子成父攻殺之十二諸侯表亦于齊惠公二年書王子成父敗長翟三處史文竝同攷齊惠公二年卽魯宣公二年在晉滅潞之前僅十三年耳以惠公爲襄公蓋傳寫

之譌杜因有既長且壽之說失之不攷也

十二年經鄆伯來奔 沈小宛曰杜預云稱爵見公以諸侯禮迎之劉原父曰此鄆太子也魯以諸侯逆之卽謂之鄆伯而春秋又沒其專土叛君之罪反謂之諸侯而尊之豈其然乎意者鄆伯以去年卒太子今卽位而不能自安遂出奔夫踰年卽位則直鄆伯矣以其日淺或謂之太子而左氏則誤以爲太子出奔也

又傳竄君敢辭玉 沈小宛曰杜預云不欲與秦爲好故辭玉按聘禮賓襲執圭擯者入告出辭玉注云圭贄之重者辭之亦所以致尊讓也傳言襄仲辭玉正合禮文杜乃以固陋之見亂之

又傳范無恤御戎 顧復初曰是時士會尙稱隨季知未受范此人疑非范氏之族陳氏世族譜入之晉范氏非也

又傳兩君之士皆未懋也 洪北江曰說文懋閒也謹敬也

一曰說也一曰且也春秋傳曰兩君之士皆未懋按今本閒誤間且誤甘从玉篇廣韻校改哀十六年昊天不懋杜注懋且也正用說文此注懋缺也未知何據余按此懋當與閒同義故說苑載此事云三軍之士皆未息息閒義竝通又釋文云懋爾雅願也強也且也韓詩曰懋閒也昭二十八年傳懋使吾君間勝與臧之死也以爲快此懋字亦當作訓且杜注懋發語之聲非惠氏補注訓作願亦失語意又按方言廣雅訓懋爲傷與此傳義亦通

十三年經太室屋壞杜注太廟之室正義曰天子之廟上爲重屋此是太廟當中之室其上之屋壞非太廟全壞也顧復初曰案杜孔之誤吳氏澂已駁之而家氏鉉翁獨取其說謂魯用王禮有太廟有文世室武世室周公廟居中魯公武公爲兩世室經書太室謂太廟當中最尊之世明是周公廟其謬尤甚武宮乃季孫行父所立本是瀆祀明堂位傳會爲武世室況立在成之六年此時尚未有何得援以爲據

又傳處瑕以守桃林之塞沈小宛曰續志河東解縣有瑕城劉昭引前年入瑕傳又于猗氏縣下引此年詹嘉處瑕傳云在縣東北皆非也水經注河水又東蓄水注之西北逕曲沃城南春秋文公十三年晉侯使詹嘉守桃林之塞處此以

備秦時以曲沃之官守之故曲沃之名遂爲積古之傳按僖三十年傳許君焦瑕杜預亦云河外五城之二邑史記魏世家襄王五年秦圍我焦曲沃汲郡紀年惠王後六年秦歸我焦曲沃傳以焦瑕攀稱而後此以焦曲沃攀稱則曲沃卽瑕之變名皆在宏農陝縣于晉爲河外而解與猗氏之瑕非秦所侵及詹嘉所處明矣杜預注此橫分瑕與桃林爲二處顯然違傳苟令賜采邑于晉傳又何云處瑕乎元和志桃林塞自陝州靈寶縣以至潼關皆是也一統志曲沃城在陝州西南四十二里

又傳以誘士會執其帑于晉 洪北江曰按趙岐孟子注帑妻子也章昭國語注妻子曰帑則此執其帑當亦兼妻子而

言杜注止云壽餘子恐鑿觀下傳士會云妻子爲戮而秦伯  
卽答云所不歸爾帑是帑兼妻子之一證

又傳繞朝贈之以策 惠定宇曰服虔曰繞朝以策書贈士

會劉勰曰春秋聘繁書介彌盛繞朝贈士會以策子家與趙

宣以書蓋川服說杜氏以策爲馬櫪 韓非子曰繞朝之言當矣其爲

聖人於晉而爲戮於秦也此不可不察是繞朝因贈策之言

而戮也左氏不載似韓非據秦史而言 洪北江曰白氏六

帖引舊注云以有來而不用也

又傳其處者爲劉氏 惠定宇曰宰相世系曰會適秦歸晉

有子留於秦自爲劉氏生明明生遠遠生陽十世孫戰國時

獲於魏遂爲魏大夫秦滅魏徙大梁生清徙居沛生仁號豐

公名燭字執嘉生四子伯仲邦交邦漢高祖也家君曰處者  
爲留謂留於秦者遂以爲氏漢人改爲劉以合卯金刀之說  
沈小宛曰疏疑此句爲漢時說左氏者插注以證漢劉氏  
爲堯後按元和姓纂士會之後周末家于魏又徙豐沛至豐  
公生端執嘉生漢高祖世系表又按此乃錯簡當在襄二十  
四年傳范宣子云在周爲唐杜氏下

十五年經齊人歸公孫敖之喪杜注大夫喪還不書善魯感  
子以赦父敦公族之恩崇仁孝之教故特錄敖喪歸以示義  
顧復初曰敖慢天王棄君命罪在不赦魯誅之可絕之不  
爲立後亦可乃更歸其喪晏然若無是事者此魯政刑之失  
而三家所由強也胡傳踵杜氏之謬謂聖人以赦善教陸氏

漳謂既臣其子不容不受其父之喪夫堯舜不聞以禹之與  
宥鯀之殛況文伯惠叔又未有大功可贖其父之過乎晏案  
公孫敖爲慶父逆賊之子實魯國之罪人喪無可歸之義杜  
氏謂錄以示義悖理傷教失之甚矣

又傳惠叔猶毀以爲請 沈小宛曰喪服小記久而不葬者  
惟主喪者不除此猶毀者未行卒哭變除之禮杜預不知而  
爲無稽之說

十六年傳宋人弑其君杵臼君無道也 趙子常曰傳曰君  
雖不君臣不可以不臣不得輕此兩人之罪反專惡宋公王  
申子曰君父天也豈臣子較得失之地乎今案明年四國伐  
宋傳記晉人討罪之辭而譏其猶立文公晉語記趙宣子請



師於靈公以伐宋曰宋人弑其君晉爲盟主而不脩天罰將  
權及焉公許之必有據矣獨於昭公見弑始終加以無道與  
所序之事自相反何也當時列國皆政出大夫其士民知有  
大夫而不知有君謂晉趙盾弑君爲良大夫而宋昭公見弑  
爲無道皆弑君者子孫設辭以分惡殺恥左氏不能辨遂援  
以釋經且立以爲例後見宣四年襄三十一年 焦里堂曰  
左氏極稱公子鮑之善而直云昭公無道國人奉公子鮑以  
因夫人襄夫人王姬使公出於孟諸使帥甸攻而殺之蕩意  
諸死之考昭公初立以欲去羣公子而穆襄之族率國人以  
攻公而殺公孫固公孫鄭七年昭公不禮襄夫人夫人因戴氏  
之族以殺孔叔公孫鍾離及大司馬公子卬皆昭公之黨也

司馬握節以死八年楚將伐宋出於孟諸宋公爲右孟命夙駕

載燧宋公違命文之無畏扶其僕以徇九年十四年會晉趙盾

等於新城舍楚以從晉矣其冬蕭封人高哀來奔左氏以爲

不義宋公不詳所以不義何在也春秋說謂此宋公指鮑觀宋違楚載

燧之令轉而從晉則其人固負氣不能柔屈者耳襄夫人以

公子鮑美而豔欲通之則夫人平日不安其室可知此公所

以不禮也鮑以昭公欲去羣公子故親自桓以下無不恤以

昭不禮於襄夫人遂因夫人以謀之禮於國人饑竭粟老饋

貽數於六卿之門收羅國之材人其不臣之心舊矣是時昭

之黨已盡而六卿皆鮑之黨昭孤立故知其將弑而盡以室

行其不適諸侯明日既爲人君又爲人臣不如死其性之不

屈可見未見其無道也而鮑乃因襄夫人以弑之若曰以君  
祖母殺之己可以脫惡名此司馬師逐齊王芳司馬昭弑高  
貴鄉公髦所以必假皇太后令也皇太后令極指斥芳與髦  
之不道則昭公之無道當亦襄夫人言之皇太后之令出自  
師昭則襄夫人之命亦出自公子鮑當時赴告或稱襄夫人  
以其無道廢之則師昭假皇太后之所本也或稱甸人因其  
田獵而弑之則昭歸罪於太子舍人成濟所本也孔子作春  
秋特書曰宋人弑其君杵臼不許其假命於襄夫人也不許  
其諉罪於甸人也直公子鮑弑之而已左氏稱樂書中行偃  
使程滑弑厲公則其赴告也烏不云程滑弑之也而孔子不  
許也書曰晉弑其君州蒲直樂書弑之而已據春秋之義以

例師昭則師之逐芳昭之弑髦其不得假於皇太后之令凜然可見乃左氏則以書宋人轉歸其獄於君之無道而師昭之徒得而有所託矣杜預之爲師昭飾也非無辭矣松之於齊王之廢也載魏略於其下云景王將廢帝遣郭芝入白太后太后與帝對坐芝謂帝曰大將軍欲廢陛下立彭城王據帝乃起去太后不悅云云則郭后之於芳且不得以襄夫人例而預能爲之解乎司馬昭旣殺諸葛誕習鑿齒曰自是天下畏威懷德矣種惠吳人結異類之情寵鴛葬欽忘疇昔之隙不咎誕眾揚土懷媿功高而人樂其成業廣而敵懷其德此卽公子鮑禮國人之術也大凡姦雄必結恩於民收心於士此司馬氏所以勝爽凌儉誕而取位於曹樂書所以勝三

卻而得志於州蒲齊商人弑舍亦必驟施於國而多聚士不  
獨一公子鮑之於杵臼已也

十七年傳鹿死不擇音 洪北江曰服虔云鹿得美草呦呦  
相呼至於困迫將死不暇復擇善音急之至也按莊子人閒  
世獸死不擇音郭象注譬之野獸蹶之窮地意急情迫則和  
聲不至劉逵吳都賦注凡閒暇則有好音逼急不擇音凡獸  
皆然非惟鹿也皆主音聲 言杜注以音作蔭義轉迂曲而  
無所承劉炫規之最得正義非也

又傳鋌而走險 洪北江曰說文鋌銅鐵扑也挺拔也按此  
似當从手廷高誘呂覽注猶動也蓋云動而走險耳杜注非

義訓

十八年經六月癸酉葬我君文公冬十月子卒注先君既葬  
不稱君者魯人諱弒以未成君書之子在喪之稱 惠定字  
曰家君曰杜預既葬稱君之說至此而辭窮

又傳申池 惠定字曰杜氏依京相璠說言申池在齊城南  
非也申池在海陽齊之藪多竹木故云納諸竹中若近在城  
南不須言歸舍爵也詳見襄十八年

又傳仲殺惡及視 沈小宛曰杜預云視不書賤之按母弟  
豈爲賤顧炎武云亦諱之耳

宣元年遂以夫人婦姜至自齊 沈小宛曰服云古者一禮  
不備貞女不從故傳云雖速我訟亦不女從宣公既以喪娶  
夫人從亦非禮故不稱氏見略賤之也按公穀傳與服說同

竝是苛求孔氏佐杜橫指爲闕文亦非也文四年經傳皆稱婦姜而無氏可知婦姜是魯史之常稱猶言王姬不稱王姬氏也杜預於文四年略無所說此獨指爲缺文殆是自尋方便耳

又傳以定公位 沈小宛曰杜云篡立者諸侯旣與之會則不得復討按此非傳意也春秋時習見篡弑之禍敵國以上莫不弃已死之舊交而貪建樹之私恩於是覬覦之徒以爲與于會盟已結鄰援國人亦斂怨降心莫可誰何此鄰國之罪也與之會盟者有罪矣篡竊之君豈謂罪惡便可除乎時無討惡之人儼然目之曰公曰侯則經亦不能不書之曰公與侯也非獨經多微辭也左氏身爲魯史記魯之事亦不能

不隱情以避禍如宣公此事豈教人爲惡而開以避罪之方哉其深痛而概責之可見矣曹伯負芻之執晉之討也緩遂令曹人得藉口以乞哀杜預執彼權辭便成義例其蔑經而誣傳也多矣

二年經晉趙盾弑其君夷皋注靈公不君而稱臣以弑者以示良史之法深責執政之臣傳孔子曰趙宣子古之良大夫也爲法受惡惜也越竟乃免注越竟以君臣之義絕不可以討賊 萬充宗曰晉靈卽位十四年矣未離幼志傳所云彫牆彈人不過少年兒戲卽宰夫之殺亦出一時之暴趙盾爲正卿引君當道使志於仁乃其職也一旦君臣相惡遽謀弑逆何其忍乎大抵靈公爲人躁妄未嫻師保之訓長而漸黠



不堪趙盾之專因欲殺之盾知身在必不相容而大權不容  
中失遂萌逆節已僞亡而穿行事陽收其實而陰避其名豈  
知亡不越竟反不討賊早爲董狐兩語斷定左氏惑於邪說  
乃託仲尼之言以賢趙盾嗟乎弑君者爲賢將何者而後爲  
不賢乎蓋左氏生春秋後目覩七國將興每於其先世之見  
於春秋者必預著其祥曲爲之說如陳氏則謂五世其昌八  
世莫京魏氏則謂公侯子孫必復其始而趙盾弑君更爲多  
方解免不顧聖經之書法先儒謂其好以成敗論人而是非  
謬於聖人良不誣也 毛氏大可春秋傳云晉史爲此策書  
時孔子尙未生安所得孔子之言而記之此實左氏當時懼  
強趙之名疏盾功德因妄爲此言鉏麇之死靈輒之報提彌

明之忠盾得人矣據此盾真弑君之賊有意爲之而非一朝一夕之故也春秋亂賊半屬守禮以要譽假行惠以結人心策書所載比比而是今晉君左右皆盾人矣推是術也陳完之移國操莽之移天下皆在於是 焦里堂曰萬氏毛氏之論左氏是矣而杜預則云越竟不可以討賊然則不越竟則必當討賊不討賊而越竟則可免不越竟而討賊則亦可免司馬昭使成濟弑其君而殺成濟異乎趙盾使趙穿弑其君而不殺趙穿昭之殺成濟固自以爲可以愚天下後世此預所以爲之說也

又傳以贖華元于鄭半入華元逃歸立于門外告而入見叔牂日子之馬然也對曰非馬也其人也旣合而來奔 洪北

江曰服虔載三說皆以子之馬然爲叔牂之言對曰以下爲  
華元之言賈逵云叔牂宋守門大夫華元既見叔牂牂謂華  
元曰子見獲于鄭者是由子之馬使然也華元對曰非馬自  
奔也其人爲之也謂羊斟驅入鄭也奔走也言宋人贖我之  
事旣和合而我卽來奔耳鄭眾曰叔牂卽羊斟也在先得歸  
華元見叔牂牂卽誣之曰奔入鄭軍者子之馬然也非我也  
華元曰非馬也其人也言是汝驅之耳叔牂旣與華元合語  
而卽來奔魯又一說叔牂宋人見宋以馬贖華元謂元以贖  
得歸謂元曰子之得來當以馬贖故然華元曰非馬也其人  
也言已不由馬贖自以人事來耶贖事旣合而我卽來奔  
按以叔牂爲羊斟始于鄭眾而杜用之又無別據第云羊斟

本疏

與叔牂當是名字相配今攷羊當是氏無緣作字與氏相配  
又羊斟既明言今日之事我爲政則不得更以子之馬然面  
誣華元鄭眾之說非也斟前既有言則元亦不必反爲飾辭  
杜說亦非賈以叔牂爲宋守門大夫其義最確服虔稱或一  
說亦云叔牂宋人與賈注合也又既合而來奔句正義又欲  
申杜乃不引爾雅釋詁文合對也而云合是聚合言語亦可  
謂進退失據又按淮南繆稱訓羊羹不斟而宋國危是斟又  
訓斟酌之斟其御羊斟不與謂御不與食羊羹也高誘注亦  
不以羊斟爲人姓名得之

又傳于思于思

洪北江曰賈逵云白頭貌

本服虔同疏惠

士奇曰按毛詩瓠葉云有兔斯首鄭箋云斯白也今俗語斯

白之字作鮮齊魯之間聲近斯正義云服虔以于思爲白頭  
貌字雖異蓋亦以斯聲近鮮故爲白頭也後漢書朱儁傳賊  
多髯者號于氏根注引杜注爲證按此則于爲須斯爲白于  
斯爲白須也按今杜注以于思爲多鬚貌恐非當以賈義爲  
長

又傳觸槐而死 洪北江曰呂覽觸庭槐而死外傳曰觸庭  
之槐而死韋昭注庭外朝之庭也周禮王之外朝三槐三公  
位焉則諸侯之朝三槐三卿位焉按惠氏云虜退而觸靈公  
之廷槐明歸死于君其說得之杜注以爲趙盾庭樹非也  
二年傳余爲伯儵 洪北江曰說文作百皦云黃帝之後姑  
姓按儵卽皦但移偏旁居上耳惠氏譏釋文誤字非也

四年經鄭公子歸生弑其君夷傳權不足也杜注子家權不  
足以禦亂懼譖而從弑君故書以首惡萬充宗曰前年大棘  
之戰歸生敗宋而獲華元其威權已震至是靈公立方九月  
君臣之際必多不相能歸生已陰懷異志適子公有嘗讎之  
隙遂假手焉不然豈其身執國柄不能除一亂臣反懼譖而  
從之乎異日歸生死鄭討幽公之亂斫其棺而逐其族足以  
知弑逆之由乎歸生而非專起於子公鄭人早有公評矣毛  
氏春秋傳云傳自楚人獻黿起至子家懼而從之止是策書  
原文左氏因而潤色之若夏弑靈公至權不足也是左氏愚  
意而大謬者文十七年諸侯會扈時歸生親作書使執訊之  
官告趙宣子敘十二年歸生佐寡君之嫡夷請陳於楚而朝

晉自此書出而晉使行成且使趙穿晉侯女壻池皆質於鄭則其人之強幹有爲原不在趙盾下者況宣二年大棘之戰歸生實帥師與宋右師華元相持竟獲華元樂呂竝狂狡焉此其當國用事萬萬超子公之上爲何如而口權不足是日校策書而茫然不知其就裏者宜乎啖助趙匡之徒得只起而譏其後也

又傳君子曰仁而不武無能達也往初稱畜老仁也不討子公是不武也故不能自通於仁道而陷弑君之罪 焦里堂曰杜預援左氏之說而以歸生之弑君爲本無其心又以不討子公爲不武不能自通於仁道全是爲司馬昭解說也昭上言曰高貴鄉公率將從駕入兵拔刃鳴金鼓向臣所止懼

兵刃相接卽敕將士不得有所傷害違令以軍法從事騎督成倅弟太子舍人濟橫入兵陣傷公遂至隕命輒敢濟行軍法科律大逆無道父母妻子同產皆斬濟凶戾悖逆干國亂紀罪不容誅輒敕侍御史收濟家屬付廷尉結正其罪夫子公與子家謀先子家曰齋老猶憚殺之而況君乎此左氏所謂仁杜預指明之矣昭敕將士不得有所傷害是其例也歸生權不足不能禦亂討子公故仁而不武以陷弑君之罪設令歸生之權能禦亂能討子公則仁而且武不陷弑君之罪矣昭旣先戒軍士不得有所傷害違令以軍法從事成濟傷害高貴鄉公是濟違令也昭卽按軍法科律討而族之是仁而且武矣子家不能討子公遂陷弑君之惡司馬昭能討成



濟則弑君之惡歸成濟而昭不陷之矣預於歸生其用意如此

又傳凡弑稱君君無道也稱臣臣之罪也注稱君謂惟書君名而稱國以弑言眾所共絕也稱臣者謂書弑者之名以示來世終爲不義改殺稱弑辟其惡名取有慚也書弑之義釋例論之備矣釋例天生民而樹之君使司牧之羣物所以繫命也故戴之如天地親之如父母仰之如日月事之如神明其或受雪霜之嚴雷電之威則奉身歸命有死無貳故傳曰君天也天可逃乎此人臣所執之常也然本無父子自然之恩未有家人習翫之愛高下之隔懸殊壅塞之否萬端是以居上者降心以察下表誠以感之然後能相親也若亢高自

肆羣下絕望情義圯隔是謂路人非君臣也人心苟離則位號雖存無以自固故傳例曰凡弑君稱君君無道稱臣臣之罪稱君者惟書君名而稱國稱人以弑言眾之所共絕也稱臣者謂書弑者主名以垂來世終爲不義而不可赦也然君雖不君臣不可以不臣故宋昭之惡罪及國人晉荀林父討宋曰何故弑君猶立文公而還深見貶削諸懷亂賊以爲心者固不容於誅也若鄭之歸生齊之陳乞楚之公子比雖本無其心春秋之義亦同大罪是以君子懼所以立也 劉子幾史通春秋曰案春秋之書弑也稱君君無道稱臣臣之罪而哀十四年書齊人弑其君壬于舒州斯則賢君見逆而賊臣是黨求諸舊例理有獨違 陸粲春秋左氏鐫序云太史

遷言仲尼成春秋魯君子左丘明受之爲著傳余以爲非也  
左氏之文闕麗鉅衍爲百代取則然其指意所存乃往往卑  
賤不中於道蓋戰國之初有私淑於七十子之徒不得與仲  
尼竝時又其書遭秦伏隱及漢世晚立學官自劉歆始定其  
章句吾疑歆輩以意附益之者多也又郝氏敬作春秋非左  
謂其背理傷道摘其紕繆三百三十餘條曰左實非丘明也  
知左之非丘明然後可與言春秋 焦里堂曰余讀左氏書  
深歎陸郝二子之言爲不刊何也其言之悖謬莫過於宣四  
年鄭公子歸生弑其君夷之傳以爲弑君稱君君無道之兩  
言也善乎四明萬氏之作學春秋隨筆也明辨之云春秋弑  
君有稱名稱人稱國之異左氏定例以爲稱君君無道稱臣

臣之罪甚矣其說之頗也孟子曰世衰道微邪說暴行有作所謂暴行卽弑父弑君是也所謂邪說卽亂臣賊子與其儕類將不利於君必飾君之惡張己之功造作語言誣惑眾庶是也有邪說以擠其暴遂若其君真可弑而已可告無罪然者相習旣久政柄下移羣臣知有私門而不知公室且鄰封執政相倚爲姦凡有逆節多蔽過於君鮮有罪及其臣者如魯衛出君師曠史墨之言可證也左氏之例亦猶是耳噫於弑君而謂君無道是春秋非討亂賊而反爲之先導矣邪說之惑人一至此乎然則何以稱人稱國曰稱人者以微者告也稱國者不告其人也此足以見元惡之專恣制國人以威使不敢以實告也雖然春秋從赴而書將令學者討求其實

則書人之宋鮑莒庚與書國之晉書偃莒僕吳光其罪且浮於稱名氏者矣春秋書弑君誅亂賊也然而趙盾崔杼之事時史亦直載其名安見亂賊之懼獨在春秋而不在諸史曰孟子言之矣春秋之文則史也其義則孔子取之諸史無義而春秋有義也義有變有因諸侯之策曰孫林父甯殖出其君春秋書之曰衛侯衎出奔此以變爲義者也晉史書曰趙盾弑其君齊史書曰崔杼弑其君春秋亦曰趙盾弑其君崔杼弑其君此以因爲義者也因與變相參斯有美必著無惡不顯三綱以明人道斯立春秋之義遂與天地同功彼董狐南史傳春秋而獲存晉乘楚檮杌論春秋而幸及當時則書久則亡焉懼在春秋而不在諸史有由然也雖然以盾杼之

姦惡齊晉得以名赴春秋得以名書賴史官之直筆也使晉  
宋吳苾之弑逆得董狐南史其人則書必以名赴必以實鮑  
與庚輿必不書人書偃僕光必不稱國良史又曷可少哉  
焦里堂曰萬氏頗左氏而論之詳矣確矣余因思之左氏果  
孔子之徒何至謬論若此左氏非左丘明無疑其爲是說者  
爲當時趙魏田齊等而言如所謂稱君君無道顯然謬乎孔  
子作春秋使亂臣賊子懼之義而杜預援此而演其說以爲  
非君臣爲路人其妄悖甚矣夫劉歆之於莽猶杜預之於昭  
也歆稱左氏好惡與聖人同而表之預遂以左氏爲素臣而  
尊之預之背愆而諂昭與歆之背向而諂莽情事實同其援  
左氏以爲亂臣賊子地其情事亦同儒者其恥言歆矣而甘

於服預豈莽爲漢誅從莽者遂爲國賊司馬終爲漢禪從司馬者遂爲佐命乎錫山顧氏作春秋大事表斥左氏稱君君無道之說爲大謬不通乃又作孔子作春秋亂臣賊子懼論云吾恐元凶劭安慶緒史朝義之徒雖日揭其策以示於前而彼不知懼也況人已成爲篡弒而懼之亦復何益此說大非司馬昭卽元凶劭安慶緒史朝義之流也觀其旣弒高貴鄉公而大驚自投於地曰天下其謂我何而必假太后令以甚言其君之無道又謀於其故僕射陳泰歸罪於成濟而斬之夷濟三族旣以無道爲君罪又以討賊爲己解無非援左氏之說以爲之蔽而預乃暢之詳之且卽以左氏之義爲春秋之義凡此者皆懼心之所乘思假經以愚天下夫左氏之

興始於王莽由莽國師劉歆莽將軍陳欽而顯欽傳其子元歆傳賈徽徽傳其子遠遠元竝爲名儒其說遂行於東漢自杜預爲集解釋例而亂臣賊子接迹於六朝而懼心漸泯是孔子之春秋爲邪說誣民而作而爲邪說者轉託於春秋故必知左氏之說之邪知杜預宗左氏之說之姦而春秋之義明亂臣賊子乃無所寄託而懼心復萌矣

又傳故命之曰鬪毅於菟 洪北江曰說文云楚人謂虎爲烏虺今按虺字係徐鉉新附惠氏補注以爲說文誤也又惠氏引唐石經楚人謂乳爲毅謂虎爲於菟疑今本脫一爲字不知此亦朱梁補刻石經非唐石經也又按王逸章句楚人謂乳爲鬪毅今攷鬪乃伯比之姓章句鬪字恐後人妄增



六年傳以盈其貫 沈果堂曰疾害也若酒誥厥心疾很之  
 疾疾其民謂重民賦役也貫劉光伯謂如物在繩索之貫也  
 定字云韓非子亦有 滿貫之云劉說是 蓋上數戰則戰役必重而害民之惡遂  
 如物之滿於繩索矣杜云為民所疾又云貫猶習也恐於文  
 意隔闕 沈小宛曰韓非子 說林有與悍者鄰欲賣宅而避之  
 人曰是其貫將滿也子姑待之答曰吾恐其以我滿貫也杜  
 預云貫猶習也按說文貫錢貝之貫从母貝一切經音義若  
 頡云貫穿也以繩穿物曰貫此字本訓也故滿張弓亦謂之  
 貫弓今滿貫之稱雅俗通行劉炫規杜云如物在繩索之貫  
 不得為習也此謬灼然而疏猶曲為庇護不知其何緣也  
 八年經秋七月甲子日有食之 沈小宛曰元志杜預以甲

子晦食姜氏云十月甲子朔食大衍同今歷推之是歲十月甲子朔加時在晝食九分八十一秒蓋十誤爲七

又傳楚人滅舒蓼杜注舒蓼二國名正義曰二國名蓋轉寫誤當云一國名案釋例土地名有舒羣舒舒蓼舒庸舒鳩以爲五名則與文五年滅蓼同蓋滅蓼後更復今更滅之 趙氏鵬飛曰舒同宗而異國故謂之羣舒舒蓼舒庸舒鳩皆舒也杜氏以舒蓼爲二國疏矣舒庸舒鳩豈亦兩國乎 顧復初曰案木訥之言甚當杜注兩國正義謂轉寫之誤是矣更引土地名謂有舒羣舒舒蓼舒庸舒鳩以爲五名更誤羣舒猶言眾舒豈可謂之一國乎又云與文五年滅蓼同蓋蓼滅後更復故楚今更滅之尤謬蓼與舒蓼自是兩國楚自穆王

滅蓼而莊王嗣興至此僅隔二十二年正當暴戾吞併之時  
豈能復封樹小國待莊王更滅考桓十一年傳鄖與隨絞州  
蓼伐楚師杜注蓼國義陽棘陽縣東南湖陽城在今河南南  
陽府唐縣南八十里文五年傳楚滅蓼杜注安豐蓼縣在今  
河南汝寧府固始縣東北此年楚人滅舒蓼杜注無注高氏地  
名攷謂今江南廬州府廬江縣西故舒城本爲三國地亦遠  
遠若以爲卽文五年所滅之蓼杜明注在安豐與吳越地懸  
隔如何下文云盟吳越而還乎杜誤孔更誤 江慎修曰疏  
舒蓼二國名者蓋轉寫誤當爲一國名釋例土地名有舒羣  
舒舒蓼舒庸舒鳩以爲五名則與文五年滅蓼同蓋蓼滅後  
更復故楚今更滅之劉炫以杜爲一國而規之非也彙纂今

廬州府廬江縣故舒城是也今按杜於文十四年注云舒蓼  
卽羣舒此言二國非也然二國亦非轉寫之誤劉炫規之不  
得謂其非此舒蓼與文五年之蓼不同彼蓼在安豐此舒蓼  
在舒城疏合爲一亦誤

九年傳其洩治之謂乎 趙子常曰陳洙氏曰此非聖人之  
言孔子稱三仁曰比干諫而死反罪洩治乎今案傳以稱國  
殺大夫爲有罪故雖無罪見殺者亦必求其罪以實之杜氏  
見宋曹殺大夫有不名者遂以書名爲貶非但不知經旨亦  
未究史法古今持論最不平者莫如陳靈淫亂洩治諫殺而  
先儒反罪洩治以爲不當正言於淫亂以陷于死甚且謂從  
君於昏嗚呼此第就治一身論未就陳君國論也夫君臣宜

淫戲衷袒服治知其必至於喪亡也故不避斧鑕苦口直陳  
從則君可安國可保不意其竟至於殺身也未幾而君弑矣  
又未幾而國滅矣禍有大於此者乎治身死而其言驗然則  
治無罪也殺之者之罪也春秋書陳殺其大夫洩冶繼書陳  
夏徵舒弑其君繼書楚子入陳以書爲君不道而殺諫臣必  
至於身殺國亡爲後鑒也春秋書陳殺其大夫洩冶與書晉  
殺其大夫里克衛殺其大夫甯喜齊殺其大夫高厚之類初  
無分別微傳文何由知其以諫死故諸儒皆以書名爲有罪  
余謂以書名爲有罪傳者之例也春秋未嘗有是也孔子固  
曰其文則史未嘗謂我爲春秋而列國之史可盡廢也春秋  
之義諸侯無專殺大夫故殺大夫必書者罪其專殺也有罪

名無罪亦名著其所殺之人也得失存乎其事其事則詳于國史閒有不名者則史之闕文孔子不得而增也豈以其無罪而不名乎惟名乃見其有罪亦惟名乃見其無罪然則以洩冶書名而罪洩者傳例誤之也 顧復初曰經書陳殺其大夫洩冶杜注洩冶直諫於淫亂之朝以取死故不爲春秋所貴而取名正義曰情色之惑君不能得之于臣父不能得之于子洩冶進無匡濟遠策退不能危行言孫志遠氏可卷之德死而無益故經同罪賤之文 案此段杜孔之論有傷名教謂其直諫取死不爲春秋所貴是以緘默苟容者爲賢以捐軀犯難者爲不肖也孔氏謂其懷寵不去王氏經世有言必欲皆爲子哀叔肸則亂世何賴有君子左傳假託孔子

之言而正義復遠引家語謂孔子論此事洩冶不得同於比干是朝廷自一二宗族大臣舉無一可諫者也豈不爲世教之罪人哉

十年經夏四月丙辰日有食之 沈小宛曰元志今歷推之是月丙辰朔加時在晝交分十四日九百六十八分入食限又經陳夏徵舒弑其君平國杜注靈公惡不加于民故稱臣以弑 顧復初曰案靈公朋淫殺諫無道已極而杜氏爲寬之此爲例所拘強求其說而失之者也左傳于宣四年鄭公子歸生弑其君著例曰凡弑君稱君君無道也稱臣臣之罪也其意謂稱國以弑者爲君無道明著弑君者之名氏爲臣有罪已爲大謬不通杜又從而爲之說假令靈公惡加于民

遂將諱弒者之名氏乎

又經冬齊侯使國佐來聘杜注既葬成君故稱君命使 胡氏曰雖葬先君尙爲嗣子蓋未踰年未成君也杜氏謂既葬成君失之矣 呂氏東萊曰成君在踰年而不繫乎葬也文公已葬而子惡猶以子稱卒 高氏閌曰諸侯未踰年稱子蔡邕之會宋公稱宋子惠公之葬卽速又未踰年而遣使書曰齊侯著其惡也 顧復初曰案杜氏謂既葬成君是卽其既葬免喪之誤蓋一錯則無所不錯

左傳杜解集正卷四



左傳杜解集正卷五

淮安山陽丁晏學

宣十一年經楚子陳侯鄭伯盟于辰陵 洪北江曰京相璠  
曰潁川長平有故辰亭道元云此亭在長平城西北而杜氏  
言東南謬按杜蓋取京相璠之說至西北東南或傳寫之誤  
耳又辰陵穀梁作夷陵按史記楚世家頃襄王二十一年秦  
將白起遂拔我郢燒先王墓夷陵索隱曰夷陵陵名後爲縣  
屬南郡夷辰聲相近京杜以長平縣辰亭當之不若從穀梁  
作夷陵爲諦也或擬較長平道稍回遠然按夷陵今宜昌府  
治與當陽荆門緊接二邑所屬之宛城爲春秋時會盟之地  
何獨夷陵卽以爲遠耶

又經楚納公孫寧儀行父於陳杜注二子能外託楚以求報君之讎內結強援於國故楚莊得平步而討陳賊討國復功足補過故君子善楚復之 顧復初曰案此因左氏有禮之說而其謬更甚焉者也二子從君於昏致君見弑其罪與親弑君無異且先儒謂其奔楚必誘楚子以利縣陳之謀二子實啟之使微申叔時之言陳不國矣如此陷君賣國之徒尙謂其功足補過而反責洩冶以賣直惡正醜直獎亂崇姦杜氏其不免哉 洪北江曰賈逵云二子不繫之陳絕於陳也惡其與君淫故絕之善楚有禮也疏本又賈氏依放穀梁云稱納者內難之辭釋例案左氏之意賈爲得之杜說非也 沈小宛曰案賈謂二子之惡絕於陳是也然納惡而謂楚有禮則

於義難通杜預又舉二子之功足補過夫身為貴臣朋淫婁  
豬戮賢禍主雖寸磔不足徹辜何功之可補害義傷教若說  
爲大矣傳之稱楚有禮謂入其國而不貪其土豈目二豎子  
之出入哉曰莊王以義自克何爲不殺而納之納之寧得爲  
禮曰陳國小君弱不有貴戚世臣何以立國春秋時世臣與  
其君相輔而行者也故臣有罪絕其身不絕其世非若後來  
之政臣新故相乘不憂乏材蓋積貴之繫於人心久矣楚之  
納也亦因陳所欲擇利而權耳若便恕二子之凶慝是飛廉  
惡來可追武王之誅也後儒深責楚莊又不揣彼時之情事  
矣

又傳令尹爲艾獵城沂杜解艾獵孫叔敖也襄十五年傳爲

子馮爲大司馬杜解子馮叔敖從子 正義曰案世本爲艾獵是叔敖之兄馮是艾獵之子則馮是叔敖兄之子也杜集解及釋例皆以爲艾獵叔敖爲一人馮是叔敖之子世本傳寫多誤杜當考得其真晏案杜於宣十二年傳解不從世本襄十五年傳解又依世本自相矛盾若此史記索隱引劉向曰世本古史官明於古事者之所記也班彪言左丘明記錄黃帝以來至春秋時帝王諸侯卿大夫號曰世本十五篇皇甫謐帝王世紀以世本爲左丘明作世本爲古史所記必可據依杜氏好爲臆說多與世本違異孔疏反阿杜氏而斥世本非也 淇北江曰服虔云艾獵爲賈之子孫叔敖也杜取此案世本爲艾獵爲叔敖之兄今云艾獵卽叔敖未知何據襄

十五年傳爲子馮爲大司馬世本云子馮艾獵之子而杜亦云叔敖從子也明艾獵非卽叔敖杜注一依世本一又取服注可云前後失據

十二年傳荀林父將中軍先穀佐之杜解彘季代林父 正義曰案傳文皆稱彘子今注云彘季勘譜亦以彘子彘季爲一人則杜君別有所據書傳殘缺不可得而知也劉炫云傳文皆稱彘子何以知是彘季以穀非彘季以規杜今知非者杜以子爲男子之稱季是幼小之辭季之與子是得通稱子路或爲季路舉其常稱謂之子論其字謂之季故公子友或稱季友而劉以傳惟稱彘子無彘季而規杜非也又傳曰晉原穀宋華椒衛孔達曹人同盟於清丘杜集解云原穀先穀

正義曰杜譜以爲雜人則不知誰之子也案傳先軫或稱原軫此蓋先軫之後也傳有名號之異杜譜皆並言之先穀之下不言原穀是杜脫也上文稱彘子服虔以爲食采於旃今復稱原原其上世所食也於時趙氏有原同蓋分原邑而共食之也

又傳韓厥爲司馬 洪北江曰世本桓叔生子萬萬生求伯

求伯生子輿子輿生獻子厥本疏服虔云韓厥萬元孫韋昭國

語注同杜取案史記韓世家韓之先事晉得封韓原曰韓武

子據史記所言武子蓋韓萬也後三世有韓厥與此傳正義所引世本次相同則厥爲萬曾孫不得云元孫也時兒子節孫方輯世本檢出小司馬所引世本一條云萬生賈伯賈伯

生定伯簡簡生與與生獻子厥云惟此所引與世族譜世次同則知史記及孔疏所引世本皆脫一代當以服氏所據之本爲是知必當有賅伯定伯兩世者僖十五年韓簡視師下杜注云簡晉大夫韓萬之孫韋昭國語注亦同韋杜皆當用服氏服注雖無可考然亦必據世本可知蘇子由古史考又以子輿爲簡之曾孫則大誤矣

又傳沈尹將中軍 沈小宛曰杜預云沈或作寢寢縣也惠云杜意以孫叔敖封於寢丘故謂之寢尹呂覽當染篇荆莊王染於孫叔敖沈尹蒸注云孫沈其二大夫則此沈尹也欽韓案叔敖爲令尹無容將中軍而庶尹爲之墨子所染篇楚莊染於孫叔敖沈尹似沈尹卽孫叔也又呂覽贊能云孫叔敖

沈尹莖相與友察傳云楚莊問孫叔敖於沈尹莖新序雜事作沈尹筮說苑雜言沈尹名聞天下以爲令尹而讓孫叔敖據諸文則實有沈尹其人異說難同故並存之 洪北江曰案呂覽當染篇曰荆莊王染於孫叔敖沈尹筮高誘注二大夫說苑沈尹名聞天下以爲令尹而讓孫叔敖案此則沈尹孫叔敖爲二人不得如杜說又杜注沈或作寢寢縣也案郡國志汝南郡固始侯國故寢也

又傳其君之戎分爲二廣廣有一卒卒偏之兩 沈果堂曰杜云十五乘爲一廣司馬法百人爲卒二十五人爲兩車十五乘爲大偏今廣十五乘亦用舊偏法此解是矣下云復以二十五人爲承副言一卒外復有二十五人則於偏之兩之



字難通案成七年傳云巫臣以兩之一卒適吳舍偏兩之一  
焉與此制相備形嘗互爲之說曰卒偏之兩謂卒爲偏法之  
兩也兩之一卒謂充兩法之一卒也又卒偏之兩者分其一  
卒爲偏法之兩者四也偏兩之一則一偏四兩中之一也兩  
字皆指法不指數故此處文意當云廣各別有一卒一卒又  
四分之以爲偏法之兩如此而已非謂一卒外有二十五人  
之兩也廣有一卒卒偏之兩與桓五年鄭魚麗之陣先偏後  
伍伍承彌縫者數雖異而法同彼云先偏後伍則此先廣後  
兩也彼云伍承彌縫則此兩承彌縫也陳用之禮書云先偏  
後伍伍從其偏卒偏之兩兩從其偏先其車足以當敵後其  
人足以待變亦以爲一法也 成七年傳以兩之一卒適吳

舍偏兩之一焉 沈果堂曰兩統眾兩而汎言也兩之一卒  
謂充兩法之一卒也下句偏兩其法本用一卒分充故此句  
卽主兩以稱卒也偏卽車十五乘之大偏也別有四兩從之  
偏兩之一謂四兩中之一也蓋以百人適吳而留其二十五  
人耳必言偏兩者明兩是偏家之物也此句劉杜以偏爲車  
光伯語九乘之小偏而云留九乘車及一兩二十五人亦誤

又傳吾聞致師者左射以菽 洪北江曰服虔云凡兵車之  
法射者在左御者在中戈盾在右鄭玄儀禮注蒲菽牡蒲莖  
也案此則蒲莖之可爲矢者下傳云董澤之蒲是也杜注菽  
矢之善者蓋望文生訓

又傳屈蕩爲右襄十五年傳屈蕩爲連尹襄二十年傳楚子

使屈申聞朱方杜解解申屈蕩之子 案楚有兩屈蕩同姓名春秋分記引世族譜屈申屈蕩之孫與杜注自相違異譜注之不同如此

又傳楚人碁之脫局少進馬還又碁之拔旆投衡乃出杜注碁教也 正義曰脫局拔旆皆是教人之語知碁爲教也

顧復初曰案碁字當依說文作毒字解定四年傳管蔡啟商碁聞王室哀四年傳少康爲牧正碁澆能戒之杜於兩處俱訓碁字爲毒字此傳亦宜依此解釋若訓作教字恐兩軍相敵無教敵人出險之理宜訓毒字爲近情至正義謂脫局拔旆皆是教人之語尤不可通二句是敘晉人事脫局尙不能出險更拔旆投衡乃得出非楚人口中語也

又傳有麥麩乎曰無有山鞠窮乎曰無注麥麩鞠窮所以禦  
溼欲使無社逃泥水中無社不解故曰無軍中不敢正言故  
謬語 焦里堂曰神農本草芎藭味辛溫主中風氣入腦頭  
痛寒痺筋攣緩急金瘡婦人血閉無子麥麩不見神農本經  
惟名醫別錄小麥下言作麩溫消穀止利證類本草新補麩  
一條詳列其療藏府中風氣調中下氣開胃消宿食主霍亂  
心膈氣痰逆除煩破癥結及補虛去冷氣除腸胃中塞不下  
食令人有顏色鞠窮麥麩二物皆不禦溼證類本草引春秋  
注云山芎藭能去卑溼風氣此不知何人之注卑卽指痛痺  
以痺由於溼故連云痺溼杜當本此而刪去痺字若麥麩則  
並不治痺於禦溼尤無謂矣梁簡文勅醫論云胡麻鹿霍纒

救頭痛之痢麥麴芎藭反止河魚之疾胡麻鹿霍俱見神農  
本經胡麻雖補腦髓不云治頭痛鹿霍則絕不主頭面之治  
推簡文之意謂藥有不必依主治之性故下云思不出位事  
局轅下欲求反死者於元都揚已名於綠帙豈可得乎欲醫  
者網羅愈廣譬爲詩者古今雅俗皆須寓口胡麻鹿霍未詳  
所本麥麴芎藭正指左氏所言出醫經藥性之外故云反止  
反之云者本不止此疾也然簡文所據卽由杜注而千百年  
來實無以麥麴芎藭治溼者則叔展之隱語果如杜所測乎  
蓋叔展取於聲音假借非取義於藥性還無社號叔展欲其  
免已叔展曰有麥麴乎麥者靈也鞠者曲也欲其隱靈而局  
曲也無社曰無者言無處藏也非不解也叔展曰有山鞠窮

乎鞠窮言曲躬仍麥糴麴曲之義謂其宜藏匿曲蹙於山中也無社仍曰無者言山中無處可藏也亦非不解也叔展乃曰河魚腹疾奈何謂山中無處藏可曲蹙於水也無社於是曰智井而拯之麥麴鞠窮喻其屈身藏匿山河喻匿處而度其辭於藥疾之中本非言藥言疾而杜氏望文生意謂無禦寒之藥將病謂無社不解乃無社匿解之而預則全未解也姜維歸蜀失其母魏人使其母手書呼維並送當歸以譬之維報書曰但見遠志無有當歸假借藥名以喻其意正與麥麴山鞠窮同鄭風溱洧之詩贈之以芍藥箋云其別則送女以勺藥結恩情也正義云贈送之以勺藥之草結其恩情以爲信約勺藥與約同聲故假借爲結約之意亦非取其藥性

也

十三年經晉殺其大夫先穀 晏案季本曰自戰邲至此已  
一年有半何爲始討其罪也意者先穀好剛任直多爲同列  
所排適當楚又伐宋則歸咎前敗以中先穀耳故不去其大  
夫以爲非正刑也杜氏謂書名罪先穀此以成敗論人也杜  
氏失之

十四年傳於是庭實旅百 沈小宛曰案禮器所云三牲  
魚腊邊豆之薦皆謂諸侯助祭於天子所貢耳庭實車馬與  
皮也旅百者所謂旅幣無方各以其國之所有也此實所以  
享主人者非主人之饗賓杜預謂主人亦設邊豆百品於庭  
以答賓預之此言非獨禮記未見並此傳上文聘而獻物亦

不曉其義矣

十五年經仲孫蔑會齊高固於無婁杜注杞邑 江慎修曰  
彙纂案公羊作牟婁蓋卽隱四年莒人伐杞所取之邑此時  
已爲莒邑矣杜注疑有誤

又傳晉荀林父敗赤狄於曲梁 洪北江曰劉昭郡國志注  
上黨記曰潞濁漳也縣地臨潞晉荀林父伐曲梁在城西十  
里今名石梁案杜注曲梁今廣平府曲梁縣也今考赤狄潞  
子國卽在潞縣晉欲伐赤狄必不反東走五六百里至廣平  
之曲梁況又隔太行一山杜注可云全不計道里矣

十七年經六月癸卯日有食之 沈小宛曰元志姜氏云六  
月甲辰朔不應有大衍云是年五月在交限六月甲辰朔交



分已過食限蓋誤今歷推之是歲五月乙亥朔入食限六月甲辰朔泛交二日已過食限大衍是

十八年傳以失大援者 沈小宛曰杜預云不能堅事齊晉故云案失大援之語行父之詭詞欺眾耳宣公數如齊且奔喪其事齊甚勤齊以公故反其賂所以援之者甚力傳文分明何可厚誣

成元年經作正甲 沈小宛曰顧炎武曰杜云正出甸賦驟增三倍恐未必然周制四正爲甸旁加一里爲成共出長穀一乘步卒七十二人甲士三人則正得十八人不及一甲今作正甲令正出二十五人一甸之中共出百人矣案顧說是矣而不得其證蓋一甸之中本出甲士三人今令出甲士四

人則止出一甲也知者以杜牧引司馬法云一車甲士三人  
步卒七十二人炊家子十人固守衣裝五人廩養五人樵汲  
五人輕車七十五人重車二十五人故二乘兼一百人為一  
隊李衛公問對引曹公新書同然古制惟七十五人其廝輿  
之役皆在步卒七十二人之中今司馬法百人為一隊則止  
出二十五人當一止而一甲也車兼輕重則一甸又出二乘  
也司馬法本於穰苴是春秋之中皆用止甲之法而晉楚諸  
國可知也李衛公問對此雖偽書以其論古制引之楚二廣之法每車一  
乘用士百五十人比周制差多是止出甲又不止一人矣  
二年傳三入三出 沈小宛曰杜預云三入晉軍求之劉炫  
曰齊侯三人齊軍又三出齊軍以求丑父每出之時齊之將

帥敗而怖懼以師而退不待齊侯致使齊侯入於狄卒案劉說是也齊侯破膽之後豈敢復入晉軍晉軍方憤於丑父之給既入其軍豈肯輕縱如狄衛之容情乎劉氏所解皆明通遠過杜預孔氏笨伯必欲扶立一家不容稍參異同故唐立五經正義而漢魏以下經生之業盡亡殊可惜也

又傳齊師敗矣辟女子 洪北江曰案辟讀作闕孟子行辟人趙岐注辟除人使卑辟尊也惠棟云下云乃奔則辟讀當爲趕與五年伯宗辟重同杜注訓爲避非

又傳齊侯使賓媚人杜解媚人國佐也 正義曰杜譜云國佐賓媚人武子三事互見於經傳不知賓媚人是何等名號也程公說春秋分記云歸父生佐佐生二子曰勝曰弱弱生

夏夏生書書生璿璿生高父世族譜附高父一人

又傳賂以紀獻玉磬與地 洪北江曰說文獻甑也一曰穿

也鄭眾注考工記云獻無底甑案杜注獻玉甑非是正義申  
杜更非且竹書紀年明言紀公之獻則非玉可知

又傳敢不唯命是聽 沈小宛曰杜預云完全之時尚不敢

違晉今若不幸則從命案方舉戰事不得遠言平昔完全

又傳先路三命之服 沈小宛曰尙書顧命郊特牲俱有先

路次路之文鄭注先路象路次路是象路之貳孔禮記疏先

路亦殷路也對次故稱先也然此先路亦卿之正車謂夏象

夏纓之等杜預云嘗受王先路之賜改而易新是不曉先路

之義而妄爲說案諸侯之卿車服不必皆受於王非大有功

若士會子蟠者王亦不輕賜故傳特著於彼文以爲異數今此三卿何能同時受王賜且計校於新會乎彼直以先爲前故之解其不通如此

又傳申叔跪杜解叔跪申叔時子 程公說春秋分記云楚之申氏有三申公巫臣之後屈氏別族也申舟之後及申字卽申氏也申叔時而下申叔氏也時生跪跪生豫世族譜乃以申叔時申叔跪合於申氏之後誤矣

又傳侵敗王略 洪北江曰說文略經略土地也昭七年傳云天子經略定四年吾子欲復文武之略並同案杜注云法度失之

三年傳伐厲咎如討赤狄之餘焉 惠定宇曰僖二十三傳

狄人伐虜咎如賈逵曰赤狄之別種隗姓杜注亦同赤狄種類已盡惟虜咎猶在故復討其餘劉炫以爲虜咎之國卽是赤狄之餘杜以爲餘民散入其國豈其然乎 成十三年注云季隗虜咎如赤狄之女也是杜自相矛盾

五年傳旣而告其人 沈小宛曰案其人嬰齊所使之人也白以私意告之亦如衛出公問於子貢而子貢乃私於使者古人使問之禮節如此杜預謂自告貞伯從人謬

六年傳民愁則墊隘 洪北江曰說文墊下也 方言司馬彪注莊子並同

春秋傳曰墊隘隘陋也又說文霽寒也或曰早霜讀若春秋傳墊阨隘隘古字通案杜注墊隘羸困也於訓詁爲不通正義更屬曲說鄭元尙書注墊陷也與下義並同

八年經晉殺其大夫趙同趙括杜注傳曰原屏咎之徒也明本不以德義自居宜其見討故從告辭而稱名 顧復初曰案杜此解尤牽強同括爲莊姬所譖而死無以爲之辭乃根究邲戰一事所謂欲加之罪何患無辭也拘牽之弊至於如此

九年經如宋致女 沈小宛曰曾子問疏引服虔云致女謂成昏非也士昏禮主人入親說婦之纓燭出是當夕成昏矣熊氏云如鄭義則從天子以下至於士皆當夕成昏舅姑歿者三月廟見故成九年季文子如宋致女鄭云致之使孝非是始致於夫婦也然鄭致孝之語范寧本之訓穀梁似亦未允女臨嫁時施衿結縵父母申戒之矣豈待成婦三月更施

父教於父黨哉以禮推之昏姻之好壻家有反馬之禮女家亦當有聘問之使謂之致女玉篇餽餽女也集韻女嫁後三日餽食爲餽女此俗間所行則邦國之禮可知

又經秋七月丙子齊侯無野卒 沈小宛曰杜預旣以丙子爲六月朔豈有赴從七月而追書死日於其下史書記事必不若此不近情理齊與魯境接亦不至歷一月有餘而赴蓋長歷誤推耳

又經城中城杜注魯邑在東海廩丘縣西南 顧復初曰江南通志曰晉書志東海郡無廩丘縣考後漢書志當作厚丘今爲海州沭陽縣廩丘是齊邑左傳襄二十四年齊烏餘以廩丘奔晉杜注云今東郡廩丘縣故城是此誤也當是厚宁



譌作廩字而舊唐書志云沔陽漢廩卍縣是又因杜注而譌  
矣案沔陽兩漢書及晉書志俱云東海郡厚卍縣南齊志曰  
北東海郡厚卍縣至後魏始置沔陽郡後周改爲沔陽縣以  
其地在沔水之陽也唐屬海州至今不改輿地志云厚卍廢  
縣在沔陽縣北六十里又後漢志厚卍縣注云左傳城中城  
杜預曰縣西南有中鄉城是魯中城之爲厚卍厚卍之爲沔  
陽源委歷然而杜注厚卍之譌爲廩卍無疑矣東郡廩卍縣  
在今山東曹州府范縣東南七十里係齊邑與魯無預一云  
中城魯內城先儒及近日方望谿俱從此說又案先儒云魯  
城中城因楚伐莒莒潰以無備故故懼而城之莒紀鄆邑在  
海州贛榆縣而魯中城邑在海州沔陽縣二邑本鄰近楚伐

莒事又在本年情事想當有之

十一年經晉侯使卻犇來聘已丑及卻犇盟 洪北江曰服

虔以爲卻犇卻克從祖昆弟案杜注則云從父兄今考世本

卻豹生冀芮及義芮生缺義生步揚缺生克揚生州州卽犇據

此則犇與克共曾祖故服云從祖昆弟杜改云從父誤矣

十三年傳子印子羽杜解子印子羽皆穆公子 襄二十六

年傳鄭七穆杜解穆公十一子子然二子孔三族亡子羽不

爲卿故惟言七穆 案杜云二子孔釋文云子孔公子嘉也

士子孔也正義曰成十三年傳子羽杜云穆公子世族譜云

子羽穆公子其後爲羽氏卽羽師頡是其孫此非行人子羽

公孫揮也世族譜以公孫揮爲雜人又襄三十年傳因馬師

顏介於襄庫杜解馬師顏子羽孫程公說春秋分記云羽氏別祖公孫翬生公孫申申生顏世族譜羽氏闕公孫申

十五年經仲嬰齊卒 沈小宛曰杜預云使嬰齊紹其後曰

仲氏劉炫云仲遂受賜爲仲氏故其子孫稱仲氏耳案仲遂生時已稱仲則是遂存日已得此氏也若待嬰齊爲後而曰仲氏則何能以子之氏逆加其父乎

又傳鱗朱爲少司寇杜解朱曠孫 程公說春秋分記云鱗氏祖公子鱗鱗生曠曠生文文生奏奏生朱世族譜誤以曠爲桓公子以朱爲桓公孫皆非也杜謂朱爲曠孫又與世族譜自相矛盾蓋杜譜闕鱗文奏三世故前後錯亂耳

又傳向帶爲太宰 程公說春秋分記云向勝向行戍之子

也向為人及向帶向氏族也世族譜置之雜人非也

又傳盜憎主人民惡其上 洪北江曰家語載金人銘有此

二語說苑作盜怨主人民害其貴

十六年經晉侯及楚子鄭伯戰於鄢陵 洪北江曰服虔云

鄢陵鄭之東南地也史記地理志潁川郡陽陵五行志晉有

陽陵之戰鄢作陽杜本案晉楚戰之鄢陵與克段之鄢本屬

兩地杜注失於彼而得於此若劉昭注司馬彪志合兩地為

一非也

又經公會尹子 沈小宛曰杜預云尹子王卿士子爵案畿

內固有封爵如蘇子者若公卿大夫但有八命六命四命之

差而無公侯伯子男之次且尹子為卿士若其出封當加一

等爲侯伯不當爲子男也蓋京師之王官尊之則曰公通稱則曰子若單劉者亦曰子亦曰公不獨尹氏爲然

又傳鄭子罕伐宋 沈小宛曰杜預云因滕有喪而伐宋按大國有喪或可乘閒以侵小國滕小宋大有喪何妨宋事而因滕喪伐宋乎杜以傳文不虛出而強傳其事殊不思道理也

又傳宋將鉏樂懼敗鄭師于洧陂杜解樂懼戴公六世孫將鉏樂氏族 正義曰樂懼戴公六世孫世本有文也將鉏爲樂氏之族樂鉏將鉏爲一人傳無樂鉏之文不知其何故也又傳至於鳴雁注鳴雁在陳留雍上縣西北釋例陳留在雍上縣西南有鳴雁亭 焦里堂曰續漢郡國志兗州陳留郡

陳留有鳴雁亭注云左傳成十六年衛伐鄭鳴雁杜預曰在縣西北又雍正本杞國杞遷於緣陵雍正遂爲宋地哀九年傳圍宋雍正是也宋地既至雍正則鳴雁爲鄭地自在雍正之西雍正今之杞縣在陳留東南續漢志謂陳留有鳴雁亭蓋其地在雍正之西北而實屬於陳留以續志與杜注相參正可考得其所在此注謂在雍正西北是也釋例謂在雍正西南此南字乃北字之誤若劉昭引杜注以鳴雁在陳留縣西北則誤杜明云雍正西北不云陳留西北以陳留國誤爲陳留縣耳在陳留縣西北則去雍正較遠杜不當言在雍正矣

又傳楚子登巢車

洪北江曰說文輜兵車高如巢以望敵

也春秋傳曰楚子登輶車廣雅巢高也按今本作巢杜注巢  
車車上爲輶今考說文輶澤中守草樓也杜合輶輶爲一恐  
非

又傳韎韁之跗注 沈小宛曰鄭雜問志曰跗幅也注屬也

以韎韁幅如布帛之幅而連屬之以爲衣而素裳杜注乃賈

服說周官司服疏引之案彼所指乃漢魏以下戎服所謂袴

褶也隋書禮儀志袴褶近代服以從戎今繁嚴則文武百官

咸服之車駕親戎則縛袴不舒散也中官紫褶外官絳褶腰

皮帶以代鞶革方言大袴謂之倒頓郭云今靽袴也隋唐武

官皆著大口袴褶 吳志呂範傳注江表傳曰孫策從容獨與

在遠聞綱紀猶有不整者範願營領都督佐將軍部分之出  
便釋禱著袴褶執鞭詣閣下政事曰稱領都督唐會要九品

已上朔望朝參者十月一日已後二月三十日已前並服袴  
 褶開元十九年敕應諸服袴褶者五品以上通用紬綾及羅  
 六品以下小綾按其制蓋文武官通服袴褶也六典平巾幘  
 之服武官及衛官尋常公事則服之注冠褶依本品色並大  
 口袴袴褶之服朔望朝會則服之蓋本趙武靈王胡服所始  
 卽袴褶之服又與大口袴不同

周時無此制也當依鄭志

又傳次於督揚 沈小宛曰卽襄十九年諸侯盟於督揚之  
 地杜預云鄭東境臆說也

又傳奉君命無私 沈小宛曰杜預云不受卻擊請邑按無

私通言聲伯之爲人耳卻擊之私於聲伯者何至卽時宣布

十七年經十有二月丁巳朔日有食之 沈小宛曰元志姜

氏云十二月戊子朔無丁巳似失閏大衍於十一月丁巳朔

交分入食限今歷推之是歲十一月丁巳朔加時在晝交分



十四口二千八百九十七分入食限與大衍同

又經晉殺其大夫卻錡卻犇卻至 惠半農曰穀梁子曰自禍於是起矣三卻不死厲公不弑欒書所畏而忌者惟卻至耳殺三卻者非胥童乃欒書也鄆之戰欒書請俟齊魯之師卻至獨以爲不可楚有五閒急擊勿失於是敗楚師於鄆陵欒書是以畏而忌之既戰獲楚公子發鉤欒書陰誘發鉤使讒卻至由是發鉤如其言以告厲公公問欒書書曰臣固聞之且云卻至欲爲難使卻犇緩齊魯之師而已勸君戰戰敗將納孫周而立之乃使卻至聘於周而書又陰使人說孫周使見卻至卻至不知其謀而見孫周公使覘之以爲信遂使胥童殺三卻卻錡欲以其黨攻公卻至不可至死不敢爲難

奉君命也可不謂忠乎欒書既殺三郤遂弑厲公乃納孫周而立之是爲悼公欲爲難而納孫周者書之志也顧以此誣郤至郤至死而其志得行處心積慮十餘年而後成其姦甚矣故春秋數稱晉欒書帥師一救鄭一侵蔡一伐鄭明專國也乃厲公死而書乃弑君之賊其名絕不復見矣晉人不知其姦反頌其德比之召公而書之惡應不可掩故餘殃終及其孫事詳內外兩傳而我特斥其惡者所以誅姦諛於既死也又云欒書之姦如後世司馬懿父子故愚表而出之欒書怨郤至且忌其才故先殺三郤則道君爲亂者非書而誰故春秋兩書殺其大夫然後書弑其君則殺大夫及弑君者實欒書一人而已宋人殺其大夫宋人弑其君杵臼春秋三書

人晉殺其大夫晉弑其君州蒲春秋三書晉明殺大夫者卽  
弑君之賊也後之學者詳焉 焦里堂曰惠氏表郤至之忠  
揭樂書之姦可謂精矣書比司馬懿父子三郤則曹爽何晏  
之比也曹爽殺而司馬氏起矣三郤胥童殺而樂書不可制  
矣童以私怨殺三郤而因以劫書長魚矯曰不殺二子憂必  
及君則書之惡童與矯固知之故書必假童矯以殺郤復因  
執厲公以殺童晉殺三郤殺胥童所以甚書之惡非以貶三  
郤胥童也綺奪夷羊五田犇與長魚矯爭田執梏其父母妻  
子誠爲侈矣若至不從樂書以敗楚師未見其爲不善也書  
誅殺三郤而謂春秋書之爲罪郤氏失民是懿謀殺曹爽何  
晏等而不罪懿之姦乃罪爽之驕盈晏之浮虛也左氏旣失

春秋之義而預乃曰宜爲國戮何宜之有哉

又傳民不與郤氏胥童道君爲亂故皆書曰晉殺其大夫注厲公以私欲殺三郤而三郤死不以無罪書書偃以家怨害胥童而胥童受國討文明郤氏失民胥童道亂宜其爲國戮惠半農曰弑君曷爲或稱名或稱國稱國謂專國者晉之專國者樂書故稱國樂書弑厲公猶趙盾弑靈公盾直稱名書獨隱其名而稱國則晉之董史失其官矣人皆知郤至之伐莫知樂書之姦左氏雖虛張郤至之伐仍不能揜其忠雖盛稱樂書之美仍不能揜其惡

十八年傳齊侯使士華免以戈殺國佐於內宮之朝杜解華免齊大夫 正義曰杜世族譜於齊國雜人之中有華免而

無士字此注以華免爲大夫則士者爲士官也

又傳以塞夷庚 洪北江曰繁欽辨惑云吳人以江海爲夷庚陸機辨亡論云旅皇輿於夷庚惠棟曰夷庚蓋通謂車馬往來之大道今按夷平也庚道也古字庚與迤通辭綜西京賦注迤道也廣雅亦同詩序由庚萬物皆由其道也是皆訓庚爲道矣此傳云以塞夷庚通謂車馬往來之平道杜注乃云吳晉往來之要道則似實有其地似非也

襄三年傳楚子重取鳩茲至於衡山杜注鳩茲吳邑在丹陽蕪湖縣東衡山在吳興烏程縣南 顧復初曰案杜注衡山甚謬鳩茲城在今江南太平府蕪湖縣東三十里烏程爲今浙江湖州附郭時吳都尙在無錫從無錫至湖州尙三四百

里楚兵不應反過吳都也當塗縣東北六十里有橫山橫與  
衡古通用俱在太平府此說得之 沈小宛曰杜預云衡山  
在吳興烏程縣南按一統圖烏程在吳郡西南子重不能越  
吳而至彼劉昭注引或說在丹陽縣之橫山當是祝穆方輿  
勝覽太平州當塗縣東北六十里建康志橫山在江寧縣東  
南百二十里接太平州界周八十里高二百丈其山四面望  
之皆衡故又名衡望山一統志山在溧水縣西三十里周百  
里跨上元縣及太平府當塗縣界按方輿紀要廣德州又有  
橫山在州西五里或當日楚兵取道由蕪湖南至廣德而抵  
湖州元兵滅宋道亦由此

又傳使鄧廖帥組甲三百被練三千 洪北江曰賈逵云組

甲以組綴甲車士服之被練帛也以帛綴甲步卒服之凡甲所以爲固者以盈竅也帛盈竅而任力者半卑者所服組盈竅而盡任力尊者所服馬融曰組甲以組爲甲裏公族所服被練以練爲甲裏卑者所服本疏呂覽有始篇邾之故法爲甲裳以帛高誘曰以帛綴甲卽被練是也公息忌謂邾君曰不若以組甲凡甲之所以爲固以滿竅也今竅滿矣而任力者半耳且組則不然竅滿則盡任力矣邾君以爲然高誘曰組甲以組連甲按賈氏之說蓋本於此杜注以意爲之非是

沈小宛曰杜預云漆甲成組文被練練袍按組條也漆如何成條文袍是有著之稱非戰所用賈云組甲以組綴甲軍士服之被練帛也以帛綴甲步卒服之凡甲所以爲固者以盈

竅也帛盈竅而任力者半卑者所服組盈竅而盡任力尊者所服馬融云組甲以組爲甲裏公侯所服被練以練爲甲裏卑者所服按初學記二十引周書曰年不登甲不組滕注曰縷繩甲不以組少儀甲不組滕注云組滕以組飾之及紵帶也疏云謂以組連甲及爲甲帶言紵帶解經滕字滕是縛約之名釋文云紵結也如鄭義亦以組連甲因以爲飾惠棟云諸說賈氏爲長呂覽應同篇邾之故法爲甲裳以帛注以帛綴甲也公息忌謂邾君曰不若以組凡甲之所以爲固者以滿竅也今竅滿矣而任力者半耳且組則不然竅滿則盡任力矣邾君以爲然賈氏之注本此被練若非甲則被練三千免者三百旣非甲士是何物也白練袍爲戰服妄矣且賈云



盈竅杜既不明孔亦不疏好爲臆說撥弃先儒不好學如是乎

又傳晉侯以魏絳爲能以刑佐民矣反役與之禮食使佐新軍正義曰服虔云於是魏頡卒矣使趙武將新軍代魏頡升魏絳佐新軍代趙武也世族譜魏顥魏絳俱是魏準之子顥長生頡則絳是頡之叔父顥別爲令狐氏絳爲魏氏蓋顥長而庶絳幼而適故也魏世家武子生悼子悼子生絳則絳是準孫計其年世孫應是也先儒悉皆不然未知何故

四年傳金奏肆夏之三沈小宛曰按周禮注呂叔玉以肆夏爲時邁繁遏爲執競渠爲思文鄭所不取杜預復分繁遏爲二徒形其陋

又傳三夏至敢不重拜 沈小宛曰詩譜其用於樂國君以  
小雅天子以大雅然而饗賓或上取燕或下就何者天子饗  
元侯歌肆夏合文王諸侯歌文王合鹿鳴諸侯於鄰國之君  
與天子於諸侯同天子諸侯燕羣臣及聘問之賓皆歌鹿鳴  
合鄉樂疏云鄉飲酒燕禮合樂皆降於升歌歌鹿鳴合鄉樂  
則知歌文王者當合鹿鳴歌肆夏者當合文王也其於諸侯  
升歌大雅合樂小雅歌在堂上合樂在堂下由在堂下輕故  
降升歌一等此上取也諸侯以小雅燕羣臣及賓而合鄉樂  
天子以大雅燕羣臣及賓歌小雅而合鄉樂是皆爲下就也  
此用樂之差謂升歌合樂爲例其舞則燕禮云若舞則酌是  
諸侯於臣得用頌與此異也郊特牲大射燕禮皆云大夫賓

奏肆夏及杜子春周禮注賓來奏納夏皆謂賓始入及庭未  
行禮之時按此蓋用其節而不取其聲詩與升歌合樂別也按杜預解鹿鳴  
以下更說新義不知燕饗之禮爲常用之樂是燕禮等篇生  
平未之見也

又傳初季孫爲已樹六檟於蒲圃東門之外 洪北江曰說  
文檟楸也春秋傳曰樹六檟於蒲圃按襄二年杜注檟梓之  
屬今考郭璞爾雅注楸細葉者爲檟又云大而散楸小而散  
檟則檟訓楸較是

又傳敗於狐駘 惠定宇曰禮記作臺駘淮南子墜形曰沂  
出臺駘術篆文臺壺字相似壺又與狐通故傳作狐駘杜氏  
以爲卽番縣之目台山案目台卽淮南子目駘山淄水所出

杜說非也

又傳逆喪者皆髻 沈小宛曰言不爲始死之服卽用小斂時之髻著禮變也問喪親始死雞斯徒跣士喪禮主人髻髮袒婦人髻於室注始死婦人將斬衰者去笄而纒將齊衰者骨笄而纒今言髻者亦去笄纒而紛也髻之異於髻髮者旣去纒而以髮爲大紛如今婦人露紛其象也喪服女子在室爲父髻衰注髻露紛也亦用麻蓋以麻自項而前交於額上卻繞紛如著幘頭焉按小記男子冠而婦人笄男子免而婦人髻以髻當免此對士喪禮眾主人之免者也孔於彼疏云男子之免乃有兩時而惟一種婦人之髻則有三別以麻髻對男括髮時以布髻對男子爲母免時以露紛髻當喪服之

女子在室髻衰三年又云喪服所明皆是成服後既不論男子之括免則不論女子未成服之麻布髻也既言髻衰三年益知恆髻是露紒也孔氏於小記既明三種之髻後主鄭氏露紒之義爲三年恆服是不違正經於義得矣杜預本不喜爲父母執喪三年故於此注云遭喪者多不能備凶服髻而已魯雖衰替不應至此盡廢凶服若然傳當云魯於是始不成服古禮本有髻寧僅云始髻乎無忌憚之小人惑世之尤者已孔穎達亦不喜禮文故於此快然攻鄭露紒之說而不復尋鄭喪服注用麻之義所謂狗爲人吠也

六年傳子罕善之如初 沈小宛曰服云子罕不阿國法亦述樂轡以王國法忠之至也及樂轡射其門畏從華弱之罰

復善樂轡是爲茹柔吐剛喪其志矣傳故舉之明春秋之義  
善惡俱見按子罕宋之正卿雖逐子蕩何慮禍從乃昧惡惡  
之義抑心強梁是國之大命凶人得挾持之而執政爲虛器  
矣服義甚正杜說謬

又傳鄆恃賂也 趙子常曰魯以往年夏屬鄆秋使聽命於  
會安得遽有貢賦於魯蓋魯人受其財賄杜說非

九年經八月癸未葬我小君穆姜冬十二月同盟于戲晉侯  
以公宴問公年曰可以冠矣大夫盍爲冠具季武子對君冠  
必以裸享之禮行之以金石之樂節之以先君之祧處之介  
寡君在行請及兄弟之國而假備焉及衛冠於成公之廟  
顧復初曰案冠是嘉禮之大者而穆姜爲襄公適祖母當服

承重三年今以五月既葬免喪便可舉行冠禮比宴樂更甚此當日諸侯失禮之大者而孔氏於昭十五年傳以爲傳皆無譏此逢迎杜注之失而尤害理也

又傳樂喜爲司城以爲政杜解樂喜子罕也 新唐書世系表樂呂生喜喜生子城子罕與杜不同

又傳遇艮之八 顧亭林曰陸氏曰劉禹錫稱董生之說曰揲蓍者九與六爲老老爲變爻七與八爲少少爲定位國語晉公子筮得貞屯悔豫皆入非變爻故不曰有所之穆姜筮遇艮之八史曰是謂艮之隨夫艮之隨唯二不動斯遇入也餘五位皆九六故反焉筮法以少爲卦主若定者五而變者一卽宜曰之某卦觀之否師之臨之類是也今變者五定者

一宜從少占艮之六二曰艮其腓不拯其隨其心不快史以  
遇此爲不利故從變爻而占曰是謂艮之隨苟以悅於姜耳  
而杜元凱以爲雜用三易故有遇八之云非也傅氏曰艮五  
爻皆變唯二得八不變之隨筮法五爻皆變則占之卦定爻  
得隨之六二係小子失丈夫是明示穆姜以通於僞如之穢  
姜亦自知之而以彖辭爲說也 惠定宇曰服虔曰爻在初  
六九三六四六五上九惟六二不變連山歸藏之占以不變  
者爲占棟案易乾鑿度曰陽動而進陰動而退故陽以七陰  
以八爲彖易一陰一陽合而爲十五之謂道陽變七之九陰  
變八之六亦合於十五則彖變之數若之一也鄭康成注云  
彖爻之不變動者九六爻之變動者繫辭曰爻效天下之動



也然則連山歸藏占彖本質性也周易占變者效其流動也  
彖者斷也如鄭此言連山歸藏占彖故下文雖引周易仍用  
二易以彖爲占顧氏補正其說支離不可從也晉語曰公子  
筮之得貞屯悔豫皆八也筮史占之皆曰不吉閉而不通爻  
無爲也蓋以不變爲占故曰爻無爲也司空季子曰是在周  
易皆利建侯又董因曰臣筮之得泰之八曰是謂天地配享  
小往大來是雖用周易而仍占彖夏殷之法也 沈小宛曰  
劉禹錫集易九六論夫艮之隨惟二不動斯遇八也餘五位  
皆九六故反焉筮法以少爲卦主變者五而定者一故以八  
爲占艮之六二曰艮其腓不拯其隨其心不快史以爲東宮  
實幽也遇此爲不利故從變而占苟以說於姜也何則卦以

少爲主若定者五而變者一卽宜曰之某卦觀之否師之臨類是也變與定均卽決以內外今變者五定者一宜從少占懼不吉而更之故曰是謂艮之隨是謂之云者苟以說也故穆姜終死於東宮與艮會耳而杜元凱於此注以爲雜用三易故有遇八之占非臻極之理也

又傳棄位而姣 沈小宛曰棄位猶爻之失位不正故不可爲貞服讀姣爲放效之效乾鑿度曰佼易立節佼姣字通耳易繫詞知崇體卑崇效天卑法地惠氏述云崇效天五卑法地二穆姜自言棄坤之正位而效乾之姣易也杜云姣淫之別名此野文也

又傳閏月 沈小宛曰杜預云此年不得有閏月疑閏月當

爲門五日衛冀隆難杜云按昭二十年朔旦冬至其年云閏  
月戊辰殺宣姜又二十二年云閏月取前城並不應有閏而  
傳稱閏是史之錯失不必皆在應閏之限杜豈得云此年不  
得有閏而改爲門五日也蘇寬云杜爲長歷十年十一月後  
置閏旣十年有閏明九年無閏也按杜預長歷彼自編排日  
月爲解詁之用本非魯歷十年之閏亦其意造何知魯閏不  
於九年而必在十年置閏乎杜自以十年置閏而於此年閏  
月不可通則改爲門五日其愚復之情如此衛氏之難深中  
其病而蘇寬以杜解杜何其愚也

左傳杜解集正卷五